

## Dragi prijatelji/ce,

Predstavljamo vam **decmbarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **186** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

[www.omladina-bih.net](http://www.omladina-bih.net)



### SADRŽAJ

Aktivnosti u decembru 2018.....	2
Planovi za januar 2019. ....	6
Mladi pišu.....	7
Aktivnosti članova mreže.....	8
Saopštenja/informacije/donatori/pozivi .....	18

Uživajte u čitanju!

# AKTIVNOSTI ORC/HCA U DECEMBRU 2018.

Održana Generalna Skupština nacionalnih koordinatora ALF



## Anna Lindh Fondacija Bosanskohercegovačka mreža



U Briselu (Belgija) je u periodu od 10. do 11. decembra održana Generalna Skupština nacionalnih koordinatora ALF-a.

ALF je tokom ove godine, zbog prestrukturiranja unutar fondacije bila manje aktivna, što se odrazilo i na aktivnosti nacionalnih mreža. Ipak, nakon izbora novog Izvršnog direktora ALF-a, gospodina Nabil Al Sharifa, te direktorice Mediteranskog foruma, gospođe Aide Riđanović, i usvajanja programa Fondacije (2018. – 2020.) od strane Evropske Unije, Anna Lindh Fondacija

uspješno nastavlja sa radom i aktivnostima.

Na sastanku u Briselu, na kojem su učestvovali koordinatori 34 nacionalne mreže ALF sa prostora Sjeverne Afrike, Bliskog istoka, Evrope i Balkana, uz prisustvo Predsjednika ALF (**Elisabeth Guigou**), Izvršnog direktora (**Nabil AL Sharif**), Direktora MED Foruma (**Aida Riđanović**) dogovoreno je i definisano sljedeće:

- Plan rada nacionalnih mreža za naredni period (do 2020. Godine);
- Mapiranje članica nacionalnih mreža;
- Definisane agende kampanja ALF-a do 2020.;
- Definisane planove za održavanje narednog ALF Foruma (Šibenik, Hrvatska, april 2020. godine)
- Definisane planove grantova za međukulturalni dijalog (2018. – 2020), poziva za projekte, Erasmus+, prekograničnu i međumrežnu saradnju.



Generalnoj skupštini je, ispred ALF Mreže BiH prisustvovao nacionalni koordinator, direktor ORC Tuzla, Miralem Tursinović.

Više informacija o aktivnostima ALF BiH, te o pozivima za projekte očekujte u narednim biltenima.

## Frontal Blog Challenge obuka vol.2 - JAHORINA

Drugi modul Frontal Blog Challenge obuke za blogere održan je od 30. novembra do 02. decembra 2018. godine na Jahorini, gdje su učešće uzeli i članovi ORC-a Tuzla Mirela Biković, Slobodan Blagovčanin i Kenan Suljić.



Na drugom modulu Frontal Blog Challenge obuke učesnici su imali priliku da nauče kako da koriste alate za SEO optimizaciju tekstova i fotografija, nadograđivši tako stečena znanja sa prvog modula koji je održan početkom novembra 2018. godine na Kozari.

Učesnici su se i detaljnije upoznali sa veb i kontent analizom. Naglasak je bio na kreiranju kvalitetnog sadržaja, te pravilnoj promociji tekstova uz upotrebu određenih veb alata. Tokom tri dana obuke učesnici su imali priliku da slušaju predavanja Dragana Varagića, internet stratega i jednog od vodećih regionalnih stručnjaka u svijetu internet savjetovanja i Ivane Ćirković, konsultanta za internet marketing, te iskustva blogera Petra Vojnovića i Adisa Nadarevića.

## Premijera dokumentarnog filma – RE:GENERACIJA

8.decembra.2018.godine u Narodnom Pozorištu Tuzla održana je premijera dokumentarnog filma "Re:Generacija".



Film Re:Generacija je snimljen u sklopu USAID-ovog projekta koji priča o deset mladih Ambasadora pomirenja iz Drvara, Jajca, Gornjeg Vakufa - Uskoplja, Brčkog, Doboja, Stoca, Zvornika, Prijedora, Sanskog Mosta i Kotor Varoša, koji su u prethodnih godinu dana istraživali međuljudske odnose i zagovarali razumijevanje i pomirenje u BiH. Čitava priča ekranizirana je u dokumentarnom filmu Emira Kapetanovića.

U organizaciji premijere filma u Tuzli učestvovali su i članovi Omladinskog resursnog centra Tuzla.

## Trening seminar Digi-YOU-th u Sloveniji



U Črnomelju, Sloveniji je održan trening seminar pod nazivom Digi-YOU-th. Trening seminar je održan od 10. do 17. decembra u prostorijama trening centra Mladinski Center BIT. Seminar je održan u sklopu projekta Youth Work in Progress, kao četvrta aktivnost mobilnosti.

Cilj treninga je razviti kapacitete omladinskih radnika u korištenju digitalnih online i offline alata u njihovom radu sa mladima.

Na trening seminaru su učestvovali mladi iz Grčke, Italije, Hrvatske, Srbije, Albanije, Makedonije, Bugarske, Crne Gore, Bosne i Hercegovine i Slovenije.

Organizator treninga i nosilac projekta je Mreža mladih jugoistočne Europe – SEEYN. Projekat je podržala Europska Komisija kroz program Erasmus.

Omladinski resursni centar je jedan od partnera u projektu Youth Work in Progress. Na trening seminaru su učestvovala dva predstavnika ORC Tuzla, Slobodan Blagovčanin i Emir Karamujić.



## OSCE XI pregledna konferencija o poštivanju sigurnosnih obaveza BiH prema OSCE i UN



Misija OSCE-a u Bosni i Hercegovini podržala je organizaciju jedanaeste po redu Pregledne konferencije o ispunjavanju sigurnosnih obaveza Bosne i Hercegovine (BiH) prema OSCE-u i UN-u, koja je započela 28. novembra 2018. godine u Sarajevu.

Uz ocjenu napretka koji je BiH ostvarila u ispunjavanju svojih obaveza prema OSCE-u i UN-u, cilj pred učesnicima/ama trodnevne konferencije je formulisati preporuke za provedbu aktivnosti koje će doprinijeti sveukupnom unapređenju sposobnosti države da u potpunosti implementira svoje

sigurnosne obaveze.

Kao dio Savjetodavne grupe mladih, naš Slobodan Blagovčanin je uzeo učešće na konferenciji.

## Konferencija Evropske snage solidarnosti



PRONI Centar za omladinski razvoj, kao Contact Point BiH Erasmus+ YOUTH mladi i u saradnji sa SALTO Resursnim centrom za Jugoistočnu Europu, i Ministarstvom Civilnih poslova BiH, organizovali su konferenciju u Sarajevu sa ciljem promovisanja nove inicijative EU za mlade pod nazivom "Evropske snage solidarnosti".

Konferenciji je prisustvovalo preko trideset ljudi iz ministarstva obrazovanja u BiH, MCP BiH, predstavnici krovnih tijela za mlade u BiH te druge mreže organizacija za mlade u BiH.

Predstavnik ORC Tuzla je bio Slobodan Blagovčanin.

## XI Akademija za političke lidere/ke u Bosni i Hercegovini

Od 20. do 23. decembra 2018. godine u Parlamentarnoj skupštini BiH održan je treći modul u sklopu XI Akademije za političke lidere/ke u Bosni i Hercegovini, koji realizuje Peripetum mobile iz Banja Luke. Na Akademiji je aktivno učešće uzelo 20 mladih političara/ki, polaznika Akademije, a pridržilo im se i 19 studenata/ica Univerziteta u Sarajevu.



Akademija za političke lidere/ke u BiH je namijenjena aktivnim članovima i liderima bilo koje registrovane političke partije u BiH, starosti između 18 i 27 godina koji imaju preporuku i podršku za aktivno učešće na Akademiji.

Jedan od predavača je bio i naš Slobodan Blagovčanin, koji je imao priliku učesnicima Akademije predstaviti našu kampanju „Građani protiv terorizma“ i govoriti o važnosti društvenih medija za buduće političke lidere/ke u BiH.

## Građani protiv terorizma - CAT

Tokom mjeseca decembra, nastavili smo sa našim redovnim aktivnostima u sklopu projekta „Građani protiv terorizma – CAT“. Naše mačke su nastavile da oduševljavaju javnost na društvenim mrežama, a od ovog mjeseca našem timu mladih su se po drugi put pridružili i predstavnici medijske kuće „Fabrika“.

Ukoliko još uvijek ne pratite naše mačke – pozivamo vas da to učinite na: [www.facebook.com/CATBiH](http://www.facebook.com/CATBiH)



## Omladinska grupa ORC Tuzla

### ONAuBiH – Generalna skupština



Omladinska novinska asocijacija u Bosni i Hercegovini (ONAuBiH) je nevladina organizacija stvorena sa ciljem da mladima omogući kvalitetno obrazovanje na svim novinarskog posla, putem treninga, seminara i edukacija. To je multinacionalna i multietnička organizacija osposobljena pružiti mladima priliku da se pobliže upoznaju sa medijima, nauče više o njima, te sami učestvuju u stvaranju medijskog prostora. ONAuBiH organizuje različite projekte čiji je cilj predstaviti medije, daje mladima priliku da se pobliže upoznaju sa onim što ih zanima, te izravno učestvuju.

ONAuBiH je organizacija koja svojim djelovanjem nastoji dokazati vrijednost mladih ljudi i njihovih ideja. Pored toga što nastoji unaprijediti kvalitetu medija, teži ka jačanju veza među svim ljudima u BiH.

Generalna skupština ONAuBiH-a je održana u periodu od 08-09.12.2018. godine, sa ciljem biranja novog rukovodstva organizacije. Skupštini je prisustvovalo 30-ak mladih iz cijele BiH, koji su imali priliku bolje upoznati kandidate za Upravni odbor organizacije, kao i kandidatkinju za predsjednicu organizacije. Pored biranja rukovodstva, na skupštini je predstavljen i usvojen godišnji izvještaj rada organizacije za period 2017/2018. godinu, a razgovaralo se i o predstojećim aktivnostima. Jedan od delegata na generalnoj skupštini je bila i članica Omladinske grupe ORC-a, Samira Aličić.

## UMiD generacija 13 – svečana dodjela certifikata



Uči, misli i djeluj (UMiD) je jednogodišnja obuka koju organizuje Institut za razvoj mladih KULT, Sarajevo. UMiD je obuka koja polaznicima nudi mogućnost da steknu samopouzdanje, sagledaju svoje sposobnosti i potencijale, te razviju osjećaj za odgovornost u društvu i steknu vještine timskog rada i liderstva. Obuka je zvanično priznati vid neformalnog obrazovanja koje mladima pruža mogućnost stjecanja različitih kompetencija koje će ih učiniti konkurentnima na tržištu rada, a program se sastoji od seminara, praktičnih vježbi i volonterskog rada. UMiD je namijenjen mladim

ljudima od 15-30 godina. Omogućava da mladi postanu aktivni lideri u svojoj lokalnoj zajednici i pomognu u rješavanju problema mladih, upoznaju nove prijatelje, nauče nove vještine, druže se i usavrše sebe.

04.12.2018. je održano testiranje za učesnike modula koji su prisustvovali dovoljan broj sati obuke. 05.12.2018. je održana svečana dodjela certifikata i potvrda za učesnike/ce obuke Uči, misli i djeluj, kao i Uči, misli i djeluj za političke lidere (UMiDp). Dobitnica certifikata i članica Omladinske grupe ORC-a je Samira Aličić.



## Sedmica borbe protiv korupcije

21.12.2018.godine Omladinska grupa ORC-a Tuzla uz saradnju Account-a (Antikorupcijska mreža organizacija civilnog društva u BiH) obilježila je sedmicu borbe protiv korupcije.



Članovi su imali priliku da vode diskusiju na teme:

1. Šta je to korupcija?
2. Da li je korupcija zastupljena u BiH i gdje najviše?
3. Da li su nekada bili žrtve korupcije?
4. Da li su oni nekada nekog korumpirali?

Nakon diskusije imali su priliku da kroz uličnu akciju podijele letke i informišu građane o načinima borbe protiv korupcije.

## „Ja sam junak/junakinja svoje zajednice“



U Narodnom pozorištu Tuzla 07.12.2018 godine održana je peta konferencija na temu „Ja sam junak/junakinja svoje zajednice“.



Ova konferencija je bila završna aktivnost kampanje „Budi junak/junakinja svoje zajednice“. Na ovoj konferenciji su predstavljeni aktivni i poduzetni mladi, kao i dosadašnji rad

Fondacije tuzlanske zajednice u okviru Programa za mlade ljude. Učešće na ovoj konferenciji su uzeli kako pojedinci tako i mnoge nevladine organizacije koje se bave pitanjima mladih ljudi.

Na ovoj konferenciji su učestvovali i predstavnici Omladinske grupe ORC-a Tuzla.

## CODE HUB TUZLA „There is only you and your camera“

Članovi Omladinskog resursnog centra Tuzla Eldin Subaišić i Mirela Biković su u petak 21.12.2018. godine imali priliku da prisustvuju radionici pod nazivom „There is only you and your camera“, koju je organizovao BIT centar Tuzla. Radionica se bazirala na obrađivanju teme fotografije i video produkcije.

Učesnici radionice su imali priliku da čuju iskustva uspješnih i ostvarenih fotografa i videografa kako od „hobija“ do biznisa. Kako od snimanja svadbe do snimanja spota, te da li se od „hobija“ može pristojno živjeti.

„Ovim poslom se bavim 4-5 godina aktivno, s tim da imam 10 godina iskustva u oblasti grafičkog dizajna. Početak je bio vrlo spontan. Iz potrebe da se na taj posao dizajnerskog dijela odgovori, adekvatno fotografijom. U ovoj industriji je na početku bilo jako teško ostvariti komunikaciju s fotografima, danas je to skroz drugačije i lakše. Da bi se dobio rezultat koji mi kao dizajneri tražimo, moramo ponekad i sami uzeti aparat u svoje ruke.“ rekao je Mirza Efendić, jedan od osnivača freelance grupacije „UNA Storia“

Drugi sagovornik na današnjoj radionici, Jasmin Jatić, iza sebe ima mnogo iskustva kada je u pitanju foto i video produkcija. Autor je preko 60 muzičkih spotova, radio je za organizatore mnogih film



festivala, izbor za “Miss BIH” i mnoge druge velike, značajne projekte.

Učesnicima radionice je omogućeno da steknu nova znanja, iskustva o produkciji, koje nije moguće naći na internetu. Korisni savjeti stručnjaka iz prakse će im poslužiti u budućnosti.

## Depresija

Početkom decembra mjeseca, započeo je projekat u cilju podizanja svijesti o važnosti depresije i njenog globalnog širenja. Projekat je podržan od strane JU Srednje medicinske škole Tuzla, JU Dom zdravlja Srebrenik, JU Dom zdravlja Kladanj, Zavod za zdravstvo Tuzlansko kantona u Tuzli, kao i ostale zdravstvene ustanove zajedno sa građanima. Član Omladinskog resursnog centra Tuzla i vođa ovog projekta, Kenan Suljić, ističe kako se tema odlično plasirala među građane i da je dobijena pozitivna poruka. Važno je naglasiti da građani nisu dovoljno informisani o ovoj temi, da nakon upoznavanja sa depresijom došlo je do čuđenja, iskaza neznanja i shvatanja ozbiljnosti situacije u kojoj se kao društvo nalazimo kada je u pitanju depresija. Cilj ovog projekta je bio podizanje svijesti o depresiji i „buđenje“ oboljelih da se jave u zdravstvene ustanove i što prije počnu sa svojim liječenjem. Učesnici i realizatori projekta su bili osviješteni učenici, Srednje medicinske škole Tuzla. Dokaz uspješnosti projekta pokazalo je i interesovanje televizija naše države. Pa je tako „FACE TV“ Sarajevo objavio članak o projektu naših medicinaru, pažnju su dobili i od TV1 Sarajevo i Frontal portala.

Pored svijetle medicinske budućnosti, mladi medicinari su pokazali kako se društvo podstiče na pravo razmišljanje i stvaranje zdrave sredine.

„Borimo se protiv nje, depresija zalječiva je.“



## Novogodišnji party Omladinske grupe ORC Tuzla

27.12.2019. godine članovi Omladinske grupe Omladinskog resursnog centra Tuzla okupili su se na neformalnom sastanku kako bi prisustvovali uručanju certifikata najjaktivnijim pojedincima u našoj organizaciji.

Prethodna godina je bila izuzetno radna, te je u različitim aktivnostima Omladinskog resursnog centra Tuzla učestvovalo preko 400 mladih iz Tuzle i cijele Bosne i Hercegovine, a certifikate su zaslužili:

Mirela Biković, Kenan Suljić, Amina Džananović, Emir Karamujić, Benjamin Burek, Medina Delić, Hamza Delić, Nejla Ibraković, Eldin Subašić, Duško Majkić, Din Omeragić, Samira Aličić



## REDOVNE AKTIVNOSTI ORC I HCA TUZLA

Tokom decembra radili smo na održavanju i razvoju komunikacija i koordinacije unutar Omladinske mreže Bosne i Hercegovine ([www.omladina-bih.net](http://www.omladina-bih.net)). U okviru toga smo svakodnevno na mejling listu mreže ([posta@omladina-bih.net](mailto:posta@omladina-bih.net)), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

## PLANOVI HCA/ORC-A ZA JANUAR 2019.

- Nastavak implementacije projekta „CAT 18“. U okviru ovog projekta u naredom periodu naše aktivnosti su nastavak online treninga i mentorstva, te radovi na vizuelnom dizajnu stranica.
- Aktivnosti omladinske grupe ORC-a Tuzla
- Pripreme za početak aktivnosti ALF BH mreže (2019. – 2020)



***Sretnu, prosperitetnu, uspješnu i punu ljubavi 2019. Godinu želi vam osoblje ORC Tuzla***

## MLADI PIŠU:



**Autor: Kenan Suljić**  
**#Frontal Blog Challenge**

### MI IMAMO LIJEK ZA DEPRESIJU

Okruženi svakodnevnim problemima i uticajima na naše psihičko zdravlje, došli smo na ideju da svoj projekat realizujemo na temu „depresija“.

Većina kada čuje ovu riječ, odmah pomisli na suicid i njene najteže oblike, međutim depresija je oko nas prisutna u blažim oblicima sa naglaskom da je iz dana u dan ima sve više. Naš svakodnevni život je ispunjen depresijom, a da toga nismo ni svjesni.



Kao učenici Srednje medicinske škole Tuzla, odlučili smo da, povezujući sa svojim sadašnjim pozivom i vjerovatno budućom strukom, učinimo korak koji je veoma bitan za naše društvo. Uvidjevši sve veći broj oboljelih, nismo mogli pustiti da svi zajedno živimo u neznanju, i da nam potencijalni „ubica“ hoda oko glave.

Svi mislimo da se depresija manifestuje samo nakon stresnih situacija, tačno je to, ali mnogo je više drugih razloga. Ruku na srce, trenutni obrazovni sistem također je jedan od uzročnika koji dovodi do depresije. Duboko poštovanje za sve profesore, ali svugdje ima neko ko svoj posao radi 40 godina i više, a u tom poslu je najmanje ljubavi i pedagogije.

Također, veliki broj radnika svakodnevno doživljava razne torture od svojih privatnika. Neredovne plate, loši uvjeti na poslu, sve su to pogodni uslovi za stvaranje opake bolesti koja za sobom može donijeti i ono najgore, a to je smrt.



Bitno je reći da osobe koje poznajete da boluju od depresije, a nisu se javile u zdravstvenu ustanovu, da to što prije učine. I naravno, tim osobama pomaže jaka podrška, vaše prisustvo i svjetlo na kraju tunela koje oni vide, ali ne reaguju. Budite prijatelj, jer ne znamo što nas sutra čeka!



Mi nismo ovdje da držimo prodike i kako se u narodu kaže „prosipamo lafinu“, ovdje smo da napravimo promjenu vrijednu nas i naše budućnosti. Ako vi ne želite misliti o sebi, makar misliti o našoj budućoj djeci. Dolaze oni kojima je život želja, a zdravlje uslov za sreću. Nemojte zbog svog neznanja druge ubijati u pojam i dovoditi psihičko zdravlje u pitanje. Više edukacije i promjena će stići. Ako ne vi, onda ćemo mi sigurno! I naglasili bi, da se sav naš projekat realizuje pod motom: „Borimo se protiv nje, depresija izlječiva je!“

## AKTIVNOSTI ČLANICA OMLADINSKE MREŽE BiH



**Udruženje građana „C.E.Z.A.R.” Srbač**

Zdravka Čelara 29, 78420 Srbač

Tel: 051 928 126

e-mail: zdravosrbac@yahoo.com

### Obilježen 4.12. – Međunarodni dan volontera

Udruženje građana „C.E.Z.A.R.” iz Srpač obilježilo je četvrti decembar, Međunarodni dan volontera, svečanim prijemom svih volontera koji su bili aktivni u proteklih godinu dana i podjelom volonterskih knjižica. Lokalni volonterski servis djeluje pri ovom udruženju već pet godina i trenutno okuplja oko 373 volontera od čega je njih 50 bilo izuzetno aktivno u toku ove godine kroz 18 volonterskih programa. Za sve njih uručene su volonterske knjižice u kojima je upisan volonterski staž a jedna od knjižica uručena je i načelniku opštine Mlađanu Dragosavljeviću koji je takođe prisustvovao ovoj svečanosti.



U prezentaciji koja je održana u prostorijama udruženja „C.E.Z.A.R.” moglo se čuti i vidjeti da su članovi Lokalnog volonterskog servisa u protekloj godini bili aktivno angažovani u realizaciji brojnih manifestacija kao što su: U susret Vaskrsu, Konferencija beba, Srbačko ljeto i druge a učestvovali su i u obilježavanju mnogih značajnih datuma kao što je Dan sigurnog interneta u okviru koga su mladi volonteri održali nekoliko radionica za srbačke osnovce. Uz pomoć volontera održana su i dva koncerta udruženja „C.E.Z.A.R.” u protekloj godini. Bez pomoći volontera ne bi mogao biti ostvaren ni veliki uspjeh članova plesnih sekcija iz ovog udruženja koji su putovali na plesne manifestacije u Banjaluku, Vitez i Zagreb odakle su se vratili sa desetinama osvojenih medalja. Proteklih mjeseci članovi Lokalnog volonterskog servisa su učestvovali i u drugim aktivnostima, poput organizacije prijema za polaznike vrtića i izradi šarenih kutija za prikupljanje slatkiša u okviru



humanitarne akcije „Jedan slatkiš-jedno dijete“. Ostvarena je i veoma dobra saradnja sa Lokalnim timom Asocijacije srednjoškolaca u BiH iz Srpcu čiji članovi su učestvovali u brojnim volonterskim programima udruženja „C.E.Z.A.R.“. Naročito veliku podršku volontera ovo udruženje je imalo tokom realizacije projekta „Aktivno ljeto“ u okviru kojeg je organizovan turnir u stonom tenisu i izgrađen omladinski park na bolničkom brdu u Srpcu gdje je na desetine volontera aktivno radilo kako bi mladi imali kvalitetnije mjesto za provođenje slobodnog vremena i rekreaciju.

## Veliki uspjeh na Međunarodnom plesnom takmičenju u Zagrebu

Udruženje građana „C.E.Z.A.R.“ iz Srpcu osvojilo je 72 medalje na međunarodnom plesnom takmičenju „Winter Dance Open 2018“, koje je održano u subotu 15. decembra u Zagrebu. Na takmičenju su nastupili polaznici plesa i ritmičke gimnastike uzrasta od 4 do 12 godina, koji su se predstavili sa sedam koreografija, osvojivši dva treća, jedno drugo i četiri prva mjesta.



„Ovo je jedno od najvećih takmičenja na kojima smo učestvovali i naši plesači su bili zaista odlični i uspješno su parirali konkurenciji iz velikih plesnih klubova. Ono što je još bitnije od rezultata, jeste to što smo i ovaj put djeci pružili priliku da se socijalizuju i putuju i zahvaljujući roditeljima bili smo jedna od najbrojnijih ekipa na takmičenju i imali smo najbolje navijače“, rekla je direktorica udruženja Tanja Šnjegota. Veliku zahvalnost duguju i sponzorima, firmama Sistem ekologika, Dijana tekstil i Ograde Josipović, koje su podržale njihov odlazak u Zagreb.

## Održan tradicionalni Novogodišnji koncert udruženja „C.E.Z.A.R.“



Udruženje građana „C.E.Z.A.R.“ na najljepši mogući način okončalo je 2018. godinu novogodišnjim koncertom u prepunoj sali Doma kulture u Srpcu na kojoj je predstavilo svoj rad i dostignuća u proteklom periodu. Na raskošnoj sceni sve je odisalo novogodišnjim raspoloženjem, a u takvoj idiličnoj atmosferi mališani su pružili maksimum kako bi svojim roditeljima, prijateljima, bakama i dekama, pokazali šta su to sve naučili kroz edukativno-vaspitni rad u ovom udruženju. Među brojnim građanima, manifestaciji

je prisustvovao i načelnik opštine Mlađan Dragosavljević.

Na koncertu su se predstavili mali kreativci, polaznici kurseva italijanskog i njemačkog jezika i male školice engleskog jezika. Svojim uigranim plesnim pokretima i maštovitim kostimima posjetioce su posebno oduševili polaznici ritmičke gimnastike koji su odigrali koreografije: Male balerine, Slatkice, Vojnici, I just wanna live i Wrecking, kao i polaznici plesa – Pahuljice i Perlice. Koncert je okončan mini predstavom koju su izveli polaznici škole glume a sa kojima je radio reditelj Dragan Radonjić iz amaterskog pozorišta "Domino" iz Srpcu. U predstavi glumi nekoliko talentovanih učenika iz Srpcu koji su ispričali divnu novogodišnju priču o patuljcima koji tragaju za Djeda Mrazom.



Svim učesnicima programa uručeni su poklon paketići koje je obezbijedio Edukativno-kulturni centar „Ihtus“ iz Banjaluke a organizovana je i prodajna izložba kreativnih radova u vidu nakita i čestitki koje su nastale u radionicama ovog udruženja.



Institut za  
razvoj mladih KULT



Ul. 4. Viteške brigade  
34 – 36 BA, 71210 Ilidža,  
Sarajevo  
Tel: +387 33 778 778.  
Fax: +387 33 778 79  
E-mail: kult@mladi.org,  
web: www.mladi.org

## Javni poziv za obuku Uči, misli i djeluj! Za omladinske političke lidere/ice (UMiDp) Generacija 2



Institut za razvoj mladih KULT raspisao je javni poziv za učešće na obuci za omladinske političke lidere/ice, UMiD za omladinske političke lidere/ice.

Bit će odabrani polaznici/e za pohađanje obuke UMiDp, koja će se sastojati od tri petodnevna modula, kreirana iz tri oblasti:

1. politički sistem u BiH i djelovanje u njemu, 2. razvoj političkog imidža i 3. političko zagovaranje i pregovaranje za rješavanje problema i potreba mladih.

Planirani raspored održavanja modula UMiDp obuke:

Modul I – 6 - 10. 2. 2019. g.

Modul II – 6 - 10. 3. 2019. g.

Modul III – 3 - 7. 4. 2019. g.

### Kriteriji za prijavu

- Starosna dob podnosioca/teljice prijave je od 18 do 30 godina.
- Podnosilac/teljica prijave član je političke stranke registrirane u BiH.
- Podnosilac/teljica prijave nije pohađao obuku Uči, misli i djeluj! za omladinske političke lidere/ice, generacija 1.
- Dostavljena je sva tražena dokumentacija.

Poziv ostaje otvoren do petka, 18. 1. 2019. g., do 16.00 sati, a detalji poziva dostupni su na [www.mladi.org](http://www.mladi.org).

## LAKO do rješenja problema u LOKalnoj zajednici

Timu Inicijative Snaga lokalnog svakodnevno pristižu prijedlozi građana o rješenju problema u njihovim lokalnim zajednicama.

Cilj inicijative koja je pokrenuta 2017. godine i jeste da pomaže i podržava lokalne zajednice u BiH da prepoznaju resurse i pruži potrebnu podršku kako bi radili na rješavanju problema u samim zajednicama.

Institut za razvoj mladih KULT kroz inicijativu Snaga lokalnog pomaže lokalnim organizacijama, neformalnim grupama ili pojedincima/kama kako da pronađu rješenje za probleme koje su sami prepoznali u svojoj zajednici. Kroz ovu inicijativu svi građani/ke mogu prijaviti probleme koje žele riješiti u svojim lokalnim zajednicama, nudeći konkretne prijedloge za rješenja, koristeći lokalne resurse i povezujući se sa drugim akterima svoje zajednice.

Kako bi im se dodatno olakšalo u cjelokupnom procesu, kao način komunikacije uveden je viber broj, telefonska komunikacija, a članovi timova kontinuirano rade na terenu i razgovaraju sa građanima.

Snaga lokalnog podržava sva fizička i pravna lica, kao i neformalne grupe građana koji imaju prebivalište, odnosno registrirani su u jednoj od sljedećih lokalnih zajednica u Bosni i Hercegovini: Bihać, Bosansko Grahovo, Bosanska Krupa, Bosanski Petrovac, Berkovići, Bileća, Bužim, Cazin, Čapljina, Čitluk, Drvar, Gacko, Glamoč, Grude, Istočni Drvar, Istočni Mostar, Ključ, Krupa na Uni, Kupres, Ljubinje, Ljubuški, Neum, Nevesinje, Novi Grad, Petrovac, Posušje, Prozor/Rama, Ravno, Ribnik, Stolac, Trebinje i Velika Kladuša.

Inicijativu Snaga lokalnog zajedno provode USAiD BiH i Institut za razvoj mladih KULT.

Sve informacije dostupne su na: [www.snagalokalnog.org](http://www.snagalokalnog.org).

## Građanskim inicijativama do boljih zajednica u BiH

Institut za razvoj mladih KULT i u 2019. godini nastavit će sa realizacijom Lokalnih građanskih inicijativa (LGI).

Tokom prethodnih godina, Institut je izdvojio više od 3 miliona maraka kako bi podržao druge nevladine organizacije, uglavnom omladinske, u realizaciji akcija kojim mijenjaju svoje sredine

U akcijama je učestvovalo najmanje 15.000 mladih, a promjene su se dešavale u zajednicama širom Bosne i Hercegovine.

Rezultat lokalnih građanskih inicijativa su jače organizacije, novi parkovi, omladinski centri, brojne ekološke akcije, sportski sadržaji, motiviraniji mladi koji su spremni poduzeti inicijativu i krenuti u akciju. Kroz građanske inicijative, lokalno stanovništvo gledalo je kako zapušteni i zarasli prostori prerastaju u parkove, izletišta i šetališne staze, kako se na do tada nepristupačnom prostoru rađa vidikovac, kako iz ruševina izrasta prostor za mlade. Gledali su najljepšu uličnu umjetnost, i sa tabli sa nazivima ulica čitali najzanimljivije legende. Zbog dosadašnjih rezultata, u predstojećoj godini cilj je intenzivniji rad i još veći broj mladih ljudi koji će biti promjena.





## Asocijacija srednjoškolaca u Bosni i Hercegovini

Ul. Mula Mustafe Bašeskije 7, 71000 Sarajevo  
 Tel/fax: +387 33 205 850  
 E-mail: asubih@yahoo.com  
 Web: www.asubih.ba

### Međunarodni dan volontera



Na samom početku mjeseca organizovali smo obilježavanje 5.12.- Međunarodnog dana volontera.

Kao i svake godine, i ove smo poslali snažnu poruku zašto je volonterizam važan za cijelo društvo.

Preko 600 srednjoškolaca iz 40 lokalnih zajednica iskoristilo je priliku i volontiralo u svom gradu.

Lokalne kompanije, kafići, apoteke, restorani imali su priliku ugostiti članove Asocijacije koji su volontirali na taj dan i tako dali svoj doprinos u radu.

Pored toga, neki od lokalnih timova održali su radionice kojima su mogli prisustvovati svi zainteresovani srednjoškolci i na taj način podijelili svoje znanje i vještine sa drugima.

### Grupa volontera u AsuBiHu

Nakon objavljenog konkursa za prijavu za Grupu volontera, Upravni odbor je zaprimio 27 aplikacija i pregledao sve pristigle aplikacije. Upravni odbor je izabrao 11 volontera koji će obavljati tu funkciju 11 mjeseci, a oni su:

Almedina Išerić (Sarajevo)  
 Majida Hasković (Brčko)  
 Azra Sorguč (Visoko)  
 Emil Karajić (Velika Kladuša)  
 Sofija Savić (Gacko)  
 Sonja Kjara Perić (Mostar)  
 Nejla Ibraković (Gradačac)  
 Adnan Karamujić (Brčko)  
 Tara Prasko (Bugojno)  
 Ana Mirecki (Banja Luka)  
 Melisa Neslanović (Busovača)



Ovih jedanaest aktivnih ljudi imat će priliku direktno se upoznati sa radom Upravnog odbora, te svojim idejama i znanjem pomoći u razvijanju svake od funkcija u Upravnom odboru.

Kandidatima koji nisu prošli dalje zahvaljujemo na prijavi i želimo im puno sreće u nastavku svog aktivističkog angažmana.



## H.O. MUSLIMANSKO DOBROTVORNO DRUŠTVO – MERHAMED DOBOJ

Ul. Kralja Aleksandra 17, 74000 Dobož  
Tel./fax: +387 53 226 886  
E-mail: merhamet.doboj@cutuk.net  
FB: [www.facebook.com/Merhamet-Doboj](http://www.facebook.com/Merhamet-Doboj)

Osim stalnih aktivnosti koje podrazumjevaju: Evidentiranje članarine, štampanje korisnicima molbi, žalbi, raznih dopisa, fotokopiranja, rada sa članovima, pružanja informacija, raspodjele humanitarne pomoći, izrada projekata i prisustvo seminarima, okruglim stolovima i drugim sesijama, Merhamet Dobož je tokom septembra radio na sljedećem:

**05.12.2018** Održan Okrugli sto na temu "Ukidanje tjelesnog kažnjavanja djece". Veoma zanimljiva i aktuelna tema kojoj su prisustvovali aktivisti "Merhamet-a" i insistiralo se da Ministarstvo donese validnu odluku, kojom bi se spriječilo nasilje nad djecom



**07.12.2018** Predsjednica "Merhamet-a" Dobož Avdić Faketa je prisustvovala radionici "Izgradnja povjerenja u zajednici"

-Veoma interesantna tema "Izgradnja povjerenja i tolerancije u zajednici"

-Kako je biti manjina-veoma žustra diskusija

Ovaj trening je organizovala NVO-CPCD u okviru projekta "Dijalog za budućnost" (3 i 4)

**12.12.2018** održan okrugli sto na temu "Izrada i implementacija socijalne mobilizacije za jačanje kapaciteta lokalnih zajednica" u okviru projekta "Sprečavanje faktora zdravstvenih rizika u BiH". Slijedi izrada pojedinačnih i projekata u partnerstvu. Aktivisti "Merhamet-a" su pomno pratili kako bi uspješno izradili projekat. (5 i 6)



**14.12.2018** Predsjednica "Merhamet-a" Doboje Avdić Faketa prisustvovala je okruglom stolu na temu "Održivi povratak". Bili su prisutni predstavnici lokalnih uprava Doboja i Maglaja. Okrugli sto je organizovao OSCE-BIH. Diskusija je bila veoma oštra, s tim da se počne ozbiljno raditi na održivom povratku.



**22.12.2018** - Raspodjela humanitarne pomoći za oko 300 porodica članova "Merhamet-a". Iako je hladno vrijeme ljudi su primorani da čekaju skromni paket.

**24.12.2018** Predsjednica "Merhamet-a" Doboje Avdić Faketa prisustvovala sastanku Partnerstva za razvoj grada Doboja. Teme su bile strateško planiranje lokalnog integrisanog razvoja, godišnji plan implementacije i indikativnog finansijskog okvira 2019 i 2020 i prezentacija budžeta za 2019 gdje su se aktivisti NVO borili da uđu na budžet.



**25.12.2018** "Merhamet" Doboje je obradovao mališane za novogodišnje praznike.





## OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: [svitac@gmail.net](mailto:svitac@gmail.net)

Web: [www.svitac.org](http://www.svitac.org)

FB: [www.facebook.com/omladinska.svitac](https://www.facebook.com/omladinska.svitac)

## Dnevne radionice

Omladinska organizacija Svitac je u decembru nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Mlađi učesnici su kreirali edukativne stvari uz pomoć lokalnih i međunarodnih volontera: plesači od žice, sat od papira, na engleskom su usvajali novi vokabular za voće i povrće, na muzičkim radionicama su saznali više o muzičkim instrumentima i njihovom korištenju, pravili su kuću od drvenih štapića, te dugu od kartona i vate. Na muzičkim radionicama su takođe učili i vježbali pjesmicu „Djeda Mraze, Djeda Mraze, ne skreći sa staze“.

Materijal korišten na radionicama je karton u boji, kolaž papir, drvene i masne bojice, makaze, ljepilo, šljokice, drveni štapići, dekorativni i ukrasni papir, stickeri, radni listovi plastelin, vuna. Drugi dio radionice je namijenjen za relaksaciju, osvježanje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljkom je kreativno izražavanje na kojima su učesnici i ovaj mjesec pravili kreacije (narukvice prijateljstva, poster na temu tolerancija i antifašizam) koristeći razne materijale. Kao i jutarnja grupa i ovi učesnici su pravili edukativne i maštovite dekoracije, ali ovaj mjesec na temu zima i zimske radosti. Utorkom su učesnici vježbali engleski jezik i svakodnevnu komunikaciju, spajanje rečenica pomoću određenih elemenata, u vidu takmičarskih igara, te igre prijateljstva, koje poboljšavaju učenje engleskog u grupi i timski rad. Pored ovih aktivnosti, učesnici su na muzičkim radionicama radili sa upoznavanjem muzičkih instrumenata i vježbali različite ritmove. Srijedom su održane radionice turskog jezika sa osnovama za upoznavanje, te su usvajali vokabular za dane, mjesece i brojeve. Četvrtkom su se družili uz sportske aktivnosti i teambuilding igre, gdje su igrali razne timske igre a petkom su nastavili raditi na radionicama njemačkog jezika (vokabular na temu tolerancija). Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugima i usvoje lijepo ponašanje. Koordinator radionica u decembru je bio Adin Midžić uz asistenciju lokalnih, Weltwärts, Erasmus+ i „Love Volunteers“ međunarodnih volontera. Sve aktivnosti se održavaju u Omladinskom centru Brčko distrikta.

## Radionica gitare

Učesnici radionice gitare su vježbali gitarske duete i etide iz prethodnog perioda i upoznavali su se sa novim skalama i tonalitetima. Nastavljen je rad na razvijanju improvizacijskih sposobnosti.

## Radionica sambe

Učesnici ove radionice su uvježbavali kompozicije nastale u prethodna četiri mjeseca. „The Builder“, No-Go-Agogo“ „Perodactyl 1 i 2“, „Kiborzy“ „Reaggelic“, i „Sambasimo“.

## Muzički seminar u Prijedoru



Na poziv urbane inicijative "Manifest" iz Prijedora, četiri učesnika radionice sambe, Adin Midžić, Jovana Lukić, Ismar Mustafić i Duško Subotić, prisustvovali su seminaru na temu fuzije etno-muzike naroda Bosne i Hercegovine sa pop i rok muzikom. Seminar je održan u subotu 24. i nedelju 25. 11. 2018. godine u hotelu „Prijedor“.

Program seminara sastojao se od tri interaktivne radionice:

- Tradicionalna muzika na prostoru BiH (vokalne tradicije i instrumenti);
- Tradicija kao inspiracija (od autohtonog do savremenog muzičkog stvaralaštva);
- Radionica perkusija;

Na seminaru su učestvovali mladi ljudi iz Bihaća, Mostara, Brčkog i Prijedora.

## Interaktivna radionica na temu Raznolikost kultura i tolerancija

U okviru projekta „Tolerancija i kulturna raznolikost kroz muziku, umjetnost i sport“, međunarodni volonteri Omladinske organizacije Svitac iz Holandije i Njemačke su održali interaktivnu radionicu sa članovima ASuBiH Lokalnih timova iz Modriče i Brčkog. U prvom dijelu radionice su prezentovali kulturu, običaje i suživot različitih nacija iz zemalja iz kojih dolaze, a nakon toga se održala debata na temu tolerancija i suživot. U drugom dijelu je volonter Wouter Pels održao radionicu pisanja CV-ja na engleskom jeziku, kako bi mladi imali što bolje šanse prilikom apliciranja na različite pozicije.

Radionica je održana u od 12 do 15 časova u prostorijama Omladinskog centra Brčko distrikt, za 20 mladih osoba uzrasta 16+.



## Međunarodni dan volontera – 05.12.



Na Međunarodni dan volontera, kojeg smo obilježili 5. decembra, Svitac je organizovao interaktivnu radionicu za učenike Gimnazije i članove Lokalnog tima Brčko ASuBiH u Omladinskom centru. Tokom radionice, učesnicima su postavljena pitanja o volontiranju i aktivizmu. Poslije razmjene ideja učesnici su imali priliku da razgovaraju sa međunarodnim, kao i lokalnim volonterima, koji su učestvovali u različitim volonterskim programima, kao i o njihovim iskustvima. Radionica je završena diskusijom o volontiranju, šta to znači, i kako mladi ljudi mogu iskoristiti razne programe i prilike za putovanja i sticanja novih iskustava. Na radionici, koja je održana od 13:30 do 15:30, prisustvovalo je oko 20 učenika.

Na jutarnjoj aktivnosti od 11:00 do 13:00 časova, članovi Lokalnog tima Brčko ASuBiH su pomogli pri realizaciji muzičke radionice sa učesnicima uzrasta 4-6 godina, te na taj način doprinijeli simboličnom obilježavanju Međunarodnog dana volontera.

## Međunarodni dan ljudskih prava

Povodom Međunarodnog dana ljudskih prava, koji se obilježava 10-og decembra, Omladinska organizacija Svitac je organizovala kreativne radionice za dvije grupe učesnika. Cilj radionica je bio promovisanje i važnost ljudskih prava, podrške i međusobnog razumijevanja. Na radionici za učesnike uzrasta 4-7 učesnici su pravili snježne pahulje od papira; svaka pahulja je predstavljala primjer jednog od prava koje oni posjeduju.

Poslijepodnevna grupa je radila vježbe na temu kako prevazići predrasude i stereotipe, te su kroz te primjere spoznavali važnost ljudskih prava. Učesnici su u kreativnom dijelu radionice nacrtali univerzalni logo ljudskih prava, te na poster zapisali po jedno pravo koje su zapamtili sa radionice. Sve aktivnosti su održane u prostorijama Omladinskog centra Brčko distrikt.



## Tolerancija i kulturna raznolikost kroz muziku, umjetnost i sport 2018.



Projekat je finansirala Vlada Brčko Distrikta, a u okviru projekta održan je niz muzičkih, kreativnih i sportskih radionica koje su promovisale kulturnu raznolikost, vrijednosti tolerancije i uzajamnog poštovanja. Na ovaj način se podstaklo kreativno izražavanje, međunarodni angažman i zajednički rad učesnika u izgradnji i održavanju kulture pomiren

obrazovno učenje kako bi se ojačalo poštovanje prema zajednici kojoj pripadaju. Projekat je trajao od 26. novembra do 15. decembra 2018. godine i održan je na području Brčko Distrikta, u prostorijama Omladinskog centra. U projekat je direktno bilo uključeno 60 djece, tinejdžera i mladih sa

područja Brčko distrikta. Za vrijeme održavanja projekta snimljen je i kratak film koji možete pogledati ovdje:

<https://youtu.be/CKAMb5yJ1hQ>

## Novogodišnja zabava

Omladinska organizacija Svitac je projekat „Tolerancija i kulturna raznolikost kroz muziku, umjetnost i sport 2018“ zvanično zatvorila eventom „Novogodišnja zabava“, koji se održao u prostorijama Omladinskog centra. Novogodišnja zabava je počela u 18:00 časova za uzrast 8+. Uz pomoć međunarodnih i lokalnih volontera Omladinska organizacija Svitac je organizovala zanimljiv program za učesnike radionica, njihove prijatelje i roditelje. U prvom dijelu programa su predstavljene muzičke aktivnosti, klasične kompozicije na gitari, zatim mali hor sa izvedbama na bosanskom, hrvatskom, srpskom i engleskom jeziku, te muzička grupa sa lokalnim volonterima. U drugom dijelu zabave su održane dvije stanice gdje su učesnici imali priliku da učestvuju u raznim takmičarskim igrama, da naprave novogodišnju čestitku ili da ukrase drvo želja ručno napisanim željama. U velikom holu Omladinskog centra je postavljena izložba svih radova, koji su nastali u proteklim sedmicama projekta. U završnom dijelu zabave se održala tombola uz razne nagrade, te je upriličena i zakuska. Novogodišnju zabavu je posjetilo više od 120 gostiju.



Za januar se planira nastavak svih redovnih radionica Omladinske organizacije Svitac.



## INFORMACIJE / DONATORI / POZIVI

### Poziv članicama Mreže ACCOUNT za podnošenje aplikacija za IV ciklus grant programa „Monitoring i izvještavanje o korupciji u odabranim sektorima

Cilj grant programa je jačanje kapaciteta organizacija civilnog društva za provođenje monitoringa, prikupljanje i obradu podataka o korupciji u odabranim sektorima: javne nabavke, zaštita zviždača, zapošljavanje u javnom sektoru, zdravstvo, obrazovanje

Centar za razvoj medija i analize (CRMA) kao nositelj i INFOHOUSE kao glavni partner programa Antikorupcijska mreža u BiH – ACCOUNT, koji je finansijski podržan od strane Američke agencije za međunarodni razvoj (USAID), **poziva sve zainteresovane članice Mreže ACCOUNT da podnesu prijedloge projekata usmjerenih na aktivnosti monitoringa u oblastima: javne nabavke, zaštita zviždača, zapošljavanje u javnom sektoru, zdravstvo i obrazovanje.**

Cilj ove aktivnosti je jačanje kapaciteta organizacija civilnog društva za provođenje monitoringa, prikupljanje i obradu podataka o korupciji u odabranim sektorima.

ACCOUNT će dodijeliti sredstva za aktivnosti usmjerene na monitoring, prikupljanje i obradu podataka, i izvještavanje o korupciji u oblastima: javne nabavke, zaštita prijavitelja korupcije, zapošljavanje u javnom sektoru, zdravstvo i obrazovanje.

Četvrti ciklus finansiranja će biti dodijeljen za period od tri (3) mjeseca, sa početkom izdavanja sredstava najkasnije u februaru 2019. i završetkom u aprilu 2019. godine.

ACCOUNT će dodijeliti sredstva za ukupno pet (5) organizacija članica Mreže, za projekte provođenja monitoringa u sektorima: javne nabavke, zviždači, zapošljavanje u javnom sektoru, zdravstvo i obrazovanje.

Maksimalan iznos sredstava po jednom grantu je 2,000 \$ (dvije hiljade \$) i biće dodjeljen članicama Mreže koje dostave najbolje prijedloge, čime dobijaju i status leaderskih organizacija u monitoring timovima. Članice Mreže čiji projektni prijedlozi ne zadovolje kriterije za dobijanje statusa leaderske organizacije, mogu dobiti status watch dog organizacije (članica monitoring tima).

Komponenta “Monitoring i izvještavanje o korupciji u odabranim sektorima” podrazumjeva: formiranje pet (5) monitoring timova; 1 tim = do 5 organizacija (leaderska organizacija + watch dog organizacije).

Sredstva će biti dodijeljena putem konkurentnog procesa. Selekciona komisija sastavljena od tri predstavnika Centra za razvoj medija i analize (CRMA) će pregledati dostavljene aplikacije i dati ocjenu o relevantnosti.

**Poziv ostaje otvoren tri (3) sedmice od dana objavljivanja, od 24. decembra 2018. – 14. januara 2019. do 17:00 sati.**

Preuzmite [Aplikacioni obrazac](#) i [Uputstvo za aplikante](#).

### Poziv za dostavu aplikacija tehničke pomoći u okviru Investicijskog okvira za Zapadni Balkan (WBIF)

Direkcija za evropske integracije BiH – Ured Državnog IPA koordinatora (Ured DIPAK), obavještava sve zainteresovane korisnike da je objavljen 21. poziv za dostavu aplikacija tehničke pomoći u okviru Investicijskog okvira za Zapadni Balkan (WBIF).

Opšti uslovi za apliciranje za WBIF:

- Aplikacija mora dolaziti iz jednog od WBIF sektora: energija, transport, okoliš, socijalna infrastruktura (zdravstvo, obrazovanje, pravosuđe, socijalno stanovanje, druge javne zgrade, itd.) i sektora digitalne povezanosti.
- Zahtjev za grant sredstvima mora biti povezan s investicijom, te treba biti praćen kreditnim aranžmanom (koji je u fazi pregovaranja, ili je već sklopljen) između Bosne i Hercegovine i neke od međunarodnih finansijskih institucija uključenih u WBIF (Evropska banka za obnovu i razvoj-

EBRD, Evropska investicijska banka-EIB, Razvojna banka Vijeća Evrope- CEB, Razvojna banka SR Njemačke-KfW, te Francuska razvojna agencija- AFD), uz razmotrene finansijske mogućnosti aplikanta za zaduživanjem u budućnosti. Navedena vodeća međunarodna finansijska institucija mora izraziti interes/podršku projektu koji se predlaže i biti konsultovana pri izradi grant aplikacije.

- Zbog finansijskih obaveza koje se stvaraju, neophodno je konsultovanje relevantnih ministarstava finansija prilikom apliciranja po pitanju mogućnosti zaduživanja vezano za predloženi projekat (ukoliko je u pitanju novo zaduženje).

Specifični uslovi 21. poziva su:

- u sektoru transporta bit će prihvatljive samo one aplikacije koje imaju jasnu regionalnu dimenziju, ili otklanjaju prepreke koje usporavaju implementaciju postojećeg WBIF projekta (Informacija o grant aplikacijama za BiH i regionalnim aplikacijama dosada podržanim kroz WBIF data u aplikacionom paketu). Takođe, aplikacije se moraju odnositi na Osnovnu TEN-T mrežu.
- u sektoru digitalne povezanosti, energije, zaštite okoliša i socijalnom sektoru nema ograničenja i moguće je predlagati nove projekte (ukoliko su u skladu sa opštim uslovima za apliciranje za WBIF).

Rok za dostavu prvog nacrta aplikacija/projekata DIPAK Uredu od strane državnog resornog ministarstva je 1. februar 2019. godine. Krajnji rok za dostavu bh. aplikacija Evropskoj komisiji putem Ureda DIPAK-a je 1. mart 2019. godine.

Više detalja o načinu i smjernicama za apliciranje, uključujući i format grant aplikacije, nalazi se [u aplikacionom paketu](#).

Detaljnije informacije o Investicijskom okviru za Zapadni Balkan možete pronaći na: [www.wbif.eu](http://www.wbif.eu)

Vodič za Investicijski okvir za Zapadni Balkan je moguće preuzeti na [Vodič](#).

## SNAGA LOKALNOG: Javni poziv za bolje lokalne zajednice u BiH

Inicijativa Snaga lokalnog pomaže i podržava lokalne zajednice u BiH da prepoznaju lokalne potencijale i potrebnu podršku kako bi radili na rješavanju problema u samim zajednicama.

Institut za razvoj mladih KULT i USAID inicijativom Snaga lokalnog pomažu lokalnim organizacijama, neformalnim grupama ili pojedincima kako da pronađu rješenje za probleme koje su sami prepoznali u svojoj zajednici. Koristeći inicijativu Snaga lokalnog svi građani/ke mogu prijaviti probleme koje žele riješiti u svojim lokalnim zajednicama, nudeći konkretne prijedloge za rješenja, koristeći lokalne potencijale i povezujući se s drugim akterima svoje zajednice.

Na Javni poziv za saradnju mogu se prijaviti sva fizička i pravna lica, kao i neformalne grupe građana koji imaju prebivalište, odnosno registrirani su u jednoj od sljedećih lokalnih zajednica u Bosni i Hercegovini: Bihać, Bosansko Grahovo, Bosanska Krupa, Bosanski Petrovac, Berkovići, Bileća, Bužim, Cazin, Čapljina, Čitluk, Drvar, Gacko, Glamoč, Grude, Istočni Drvar, Istočni Mostar, Ključ, Krupa na Uni, Kupres, Ljubinje, Ljubuški, Neum, Nevesinje, Novi Grad, Petrovac, Posušje, Prozor/Rama, Ravno, Ribnik, Stolac, Trebinje, Velika Kladaša.

### CILJ JAVNOG POZIVA

Prepoznavanje i rješavanje postojećeg problema u lokalnoj zajednici.

## KRITERIJI JAVNOG POZIVA

- Akcija koja se prijavljuje treba rješavati konkretan problem u zajednici.
- Akcija koja se prijavljuje provodi se isključivo u lokalnoj zajednici.
- Akcija koja se prijavljuje uključivat će partnerstvo ili podršku lokalnih aktera (lokalne vlasti, javne institucije, poduzetnici, privredni subjekti, lokalne organizacije civilnog društva, druge ustanove, građani ili grupe iz lokalne zajednice važni za akciju).
- Akcija koja se prijavljuje treba imati širu društvenu korist.
- Akcija koja se prijavljuje ne može sadržavati honorare i naknade za osoblje akcije.
- Akcija koja se prijavljuje ne može obuhvatiti nabavku opreme koja će ostati u trajnom vlasništvu pojedinaca.
- Poželjno je da akcija koja se prijavljuje uključi saradnju s općinskom/gradskom upravom.
- Poželjno je da akcija koja se prijavljuje uključi direktno što veći broj građana iz lokalne zajednice.

## VAŽNI DATUMI I NAPOMENE

Javni poziv ostaje otvoren do utroška sredstava, a najkasnije do 14. 4. 2019. g.

Sve prijavljene akcije moraju biti provedene najkasnije do 31. 5. 2019. g.

Nakon prijave akcije, a najkasnije u roku od 48 sati ćete dobiti odgovor o prijemu i evidenciji Vaše prijave i daljim potrebnim koracima.

Više informacija: [Javni poziv](#)



## Dragi prijatelji,

*Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.*

*Rok za dostavljanje informacija za svako naredno izdanje je 30-ti u mjesecu.*

*Adrese za slanje vaših informacija za mjesečni bilten:*  
**Omladinski resursni centar Tuzla**  
**Hadži Bakirbega Tuzlića 1**  
**75000 Tuzla**  
**tel/fax: 035 258 077**  
**e-mail: [orcuzla@bih.net.ba](mailto:orcuzla@bih.net.ba)**  
**[hcatuzla@bih.net.ba](mailto:hcatuzla@bih.net.ba)**

*Mjesečni bilten uređuje*  
 Omladinski resursni centar -  
 ORC Tuzla

*Prevod Biltena na engleski: **Emir Karamujić***

*WEB stranica Mreže:*  
**[www.omladina-bih.net](http://www.omladina-bih.net)**

*Mejling lista Mreže:*  
**[posta@omladina-bih.net](mailto:posta@omladina-bih.net)**

*Webmaster:*  
**[emir.delalic@gmail.com](mailto:emir.delalic@gmail.com)**